



Schwoweblatt Nr. 7

zammstellt vun **Helen Alba**
1900 Timisoara, Calea Sagului 21, sc. B, ap. 43
Telefon: 0256-245590
E-Mail: albah@web.de
www.lenauheim.de



ALLI SCHWOWEBLATT-LESER WINSCHER MER E FROHES OSCHTERFESCHT!

Zum Oschterfescht!

De April, er macht, was er will!
Un bringt heier Oschteraijer vill!
Manchi rot, die anre geel, bloo, grien,
hat der aach de Has schun laafe gsiehn?

Fehle derf ke Bradl, ke Salat,
aach des Getränk muss stehn parat!
Uf die Gschenker soll mer nit vergesse,
dass die Kleene Tschokoladi esse!

Er tummelt sich un hats gar eilich jetz,
weil's fangt an die Oschterhetz.
Jeder will doch was im Nescht,
feire, so wie sich's gheert, des Fesch.

Un e guti Supp mit Sauerampl,
dervor aach noch e Rakistampl.
Zwischedorch getixti Aijer vill,
for was nit, gar e Hingl Grill?!

Noh de lange Faschtewuche
hat mer Gusta nit jo nor uf Kuche.
Schmoore soll jo villes in dem Tippe,
gfilltes Kraut mit fettich Rippe.

Alles scheen un gut, doch owacht gin!
For all des muss aach Geld im Sack drin sin!
Des heescht, dervor un noher spare scheen,
dass an Oschtre alles glatt kann gehn.

Wie mir Schwowe Oschtre gfeiert han

Mer kann saan, dass die Oschterzeit jo schun noh dem Äschemittwuch anfangt. Jedi Wuch is Kreizwechandacht un die Faschtezeit soll un jo vun allem Beese un Schwere befreie. Zwaa Wuche vor Oschtre is de Schwarze Sunntach. Do gin in der Kerch die schwarze Altartiecher ufgeleet, de Pharre un die Ministrante han die schwarze Gwänder an. E Sunntach druf, am Palmsunntach, gehn alli Leit mit Palm un Kätzle in die Kerch. Die gin geweiht, dernoh uf de Friedhof getraa un iwer die Haustier ghong. An dem Sunntach is frieher immer schun die Passion gsung gin, die Prozession is um die Kerch gang. Un schun brecht die Karwuch an. Am Griendunnertach owets fliehe die Glocke fort, in manchi Derfer sin se aach uf Radna gfloh. Während der Mess, beim letschte Abendmahl, sin die Gleichiche, die wu a Tach dervor gebeicht han, alli speise gang. Un jetz is die Zeit for die Raschplbuwe angebroch un de Mesner hat zwaa Täch lang Urlaub kriet, er hat nimi leite misse. Geraschpelt han die Buwe phaarmol am Karfreitach un Karsamschtach: immer beim Gebetleite, Erscht-, Zweit- oder Zammlite. Am Karfreitach Nohmittach war Anbetung un Aus- sowie Einsetzung am Heiliche Grab, dernoh sin alli Leit mitm Pharre uf de Friedhof zu de Gräwer un zum Kriegerdenkmal gang. Am Karsamschtach han die Raschplbuwe schun beizeite am Morjet anfang, die Aijer insammle zu gehn: Derbei sin se vun Haus zu Haus gang un han gsung:

Oh Leit, oh Leit, oh liewi Leit,
mir kumme zur heilich Oschterzeit!
Git uns Aijer, git uns Geld, nor ke Schlää!
Die Schlää, die tun jo weh!

Die Aijer sin schon gebacke,
mir heere se schun krache
Glick ins Haus, Unglick heraus!
E paar Dutzend Aijer heraus!

Am Karsamschtach owet is erscht im Kerchhof de Jud verbrennt gin. Dernoh hat die Auferstehungsfeier anfangt, die zum Schluss mit der Prozession un Blechmusich bis zum Friedhof gang is, "Der Heiland ist erstanden" is gsung gin. In der Kreche- un Haapgass ware alli Finschtre vun Kerze hell erleicht. De Oschtersunntach hat anfangt mit em Oschternescht suche, manchmol im Garte im Klee, wann schlechtes Wetter war, halt im Haus. Des Oschterhochamt war feierlich, meischt hat de Chor die Schubert-Mess oder "Hier liegt vor Deiner Majestät" vierstimmich gsung. Dernoh sin die Kiner zu Path un Goth, zu de Großeltre gang, ihre

Gschenker abholle. Am Oschtermontach war wieder Hochamt, nohmittachs sin die Leit zur Mai gang un owets war erschtmols noh dere Faschtezeit wieder Baal. Natierlich is mit dem die Oschterzeit noch nit rum. Es kummt de Weiße Sunntach; der Tach an dem wu immer Erschtkommunion war. Un Christi Himmelfahrt, Phingschte un de Kapelletach, uf die große Feiertäch selle mer nit vergesse!

Die Erbschaftsklausel (IV)

Florin: Mama, is besser, lasa....

Oma: Nitemol deitsch rede hascht dei Kiner gelehrt. Sowas is....

Leni: Ich kann mit meinen Kindern chinesischesch sprechen, das geht dich einen Dreck an!

Oma: Un dich geht e Dreck mei Erbschaft an. Scheer dich naus, oder ich ruf die Miliz!

Bianca: Also Leni-Oma, entweder mir kenne in Ruh miteinander rede, oder ich geh meiner Arbeit noh!

(Die Gemieter beruhiche sich. Jeder hat e anri Idee)

Leni: Und ich kann nur wiederholen....

Oma: Ich han gsaat: hall dei Gosch! Kannscht zuhorche, awer wannscht nochmol prowierscht, dich inzumische.....

Resi: Ich bin gespannt, wie ein alter Regenschirm! Es kommt mir nicht zum Glauben! Was kann man alles mit soviel Geld anfangen? Florin, du hast die besten Ideen! Sage etwas!

Oma: Loss de Florin gfällichsch ausm Gspiel. Er hat in unser Familie nor ingheirat. Ich wer mer iwerlejie, was mer mit dem Batze Geld anfangen.

Bianca: Omchen, sei so lieb und loss uns des mache. Mer kann nit me so wie in deiner Zeit mit dem Geld umgehn. Bstimmt kumme der Roland und ich zu ener Regelung, die sowohl dem Rechtsanwalt in Chikago als aach eich alle angenehm is.

(Bianca holt es Handy aus der Taschn un telefoniert mit ihrem Freind Roland)

Bianca: Hallo Roland! Dein gescheites Köpfchen muss uns aus der Patsche helfen. Komm sofort zur Oma, wir brauchen Deinen Rat als frischgebackener Computeringenieur! Also, Tschüß bis gleich!

Resi: Ich denke, dass wir die Sache auch ohne Roland auf einen gemeinsamen Nenner bringen können. Diese Jugend! Will immer gleich mit dem Kopf durch die Wand und will immer recht haben!

Florin: Ich tu wisse, was mache mit so vill Mony! E Restaurant immer gut! Esse immer jeder will!

Oma: Kannscht dei gschwolleni Red uf hewe Florin. Ich han schon mei Entschluss gfasst: mir were mit dem Geld Feld kaafe! Feld in Darowa. Un ihr alli werd mit Hand anleje un des Feld verarweite! Frucht un Kukrutz kann mer immer an de Mann bringe!

Bianca: Geh, sei doch staat Omi! Mir lewe in eener moderni Welt. Mir sin inzwischen Stadtmensche. Und do in der Stadt were mir etwas ufziehe, dass alle unsere Bekannte un Freind staune!

Resi: Diesen Optimismus der Jugend muss man haben! So einfach ist die Sache nicht, mein Kind. Dazu braucht man Fingerspitzengefühl und außer dem Geld auch ein bisschen Glück.

Bianca: Es juckt mich schon, des Fingerspitzengefühl. Mami, Tati, Omas! Schreibt eich die Tatsach endlich hinter die Ohre, dass die Jugendliche der heitich Zeit aach zu etwas nitzlich sin! Bei allem Reschpekt, die Oma gheert zum alte Eise un es dauert nimi lange, dann tret aach ihr liewe Eltre in de Ruhestand. Roland und ich were des schaffe. Mir heirate, bringe Kiner zur Welt und ihr hat dann e Bschäftichung, die großzuziehe.

Oma: Die Idee kannscht der getroscht ausm Kopp schlaan! For dass han ich dich großgezoo, han der alli Naupe abgin, dass du mich jetz wanns heiß hergeht, hinner de Owe sitze willscht? Nix do! Ich han geerbt, ich sin de Scheef!

Leni: Noch nicht Anna! Noch nicht hast du geerbt! Vergiss die Klausel nicht! Der Hans, der war doch ein heller Kopf! Der hat schon gewusst.....

Oma: Wann du nochmols dei Pfefferkeere ninwerfscht, is es aus mit unsrer Freindschaft!

Leni: Wir waren noch nie Freundinnen. Weder du noch ich waren je einverstanden mit der Heirat unserer Kinder. Die Resi....

Florin: Gura! Ich was zu saan han!

Bianca: Tati, an jedem Ecke is e Restaurant oder e Imbissstube. Loss uns de Karre ausm Dreck ziehe!
(Es kloppt an die Tier, Roland kummt rin)